

醫說

五



醫說卷第六

臟腑泄痢

✓ 當暑勿食生冷

當盛暑時食飲加意調節緣伏陰在內腐化稍遲又果蓏園蔬多將生噉蘇水桂漿唯欲冷飲生冷相值剋化尤難微傷即殄泄重傷則霍亂吐利是以暑月食物尤要節減使脾胃易於磨化戒忌生冷免有腹臟之疾雖盛夏冒暑難爲全斷飲冷但剋意少飲勿與生硬果菜油膩甜



食相犯亦不至生病也

辯臟腑下利

病水洩青白或黃白或米穀不化腸鳴腹痛者
此傷冷也爲洞泄寒中又爲霍亂吐瀉其脉細
弱而緊宜理中元平胃散調中湯以溫補之盛
則金液丹朝真丹主之或藥入則吐出者內陰
盛也用湯者當以冷服用元者以地漿服熱因
寒用之法也
病水泄下深黃及有完穀小便赤腹脇但脹滿

而不痛煩躁悶亂渴而喜飲者此傷熱也爲按
熱下利其脉洪大而數宜駐車元參連散藥皮
湯以和之甚則三黃元調胃承氣湯挾熱下血
者藥皮湯主之

病洩瀉色黃而有沫腸鳴腹脇脹滿時微作痛
者爲冷熱不調其脉沉緊而小數也服熱藥則
轉甚戊己元香連元主之下部注悶裏急後重
者必欲變膿血利之則愈

病暴泄注下或青白或黃白米穀或化或不化

腹脇或脹或不脹或痛或不痛但噫生熟氣全
不思食因與溫補諸藥而後轉有異證者有所
傷也此爲飧泄其脉外虛而內實關脉沉且緊
也宜消積元不二元以化之甚則用備急元主
之

右不二元用砒不可
多服曾見醫用有害

又春傷以風夏必飧泄又風氣行於腸胃則暴
泄下利其脉浮緩而虛也並宜服薤活安中湯
胃風湯荊黃湯訶梨散主之
病赤白下利或膿多血少或膿少血多皆爲有

積或先挾熱泄瀉更服溫藥因變膿血下利關
脉沉緊按之有力而小疾也並宜先與消化積
滯才微利過即以香連元駐車元戊己元便愈
化積滯用消積元不二元感應元淹延惡利用
朱粉丹主之

集驗方

治赤白痢

有人久患痢赤白兼下或純白或純赤百藥不
愈者病久服藥已多治痢多用毒藥攻擊得臟
氣不和所以難愈史載之用輕清和氣藥與之

遂愈後來屢有驗其方用罌粟殼蜜炙人參白
朮白茯苓川芎甘草炙黃芪等分爲細末二錢
水一盞生薑棗烏梅半箇煎八分溫服不以時

久患泄瀉

有人久患泄瀉以煖藥補脾及分利小水百種
治之不愈醫診之心脉獨弱以益心氣藥補脾
藥服之遂愈蓋心火也脾土也火生土脾之旺
賴火之燥心氣不足則火不燥脾土受濕故令
泄瀉今益心補脾而又能去濕豈有不效者

又有一種泄瀉作冷作積作心氣不足治之及服硫黃附子甚多皆不效因服火欬元而愈此腸胃有風冷也胃風湯兼服煖藥亦佳

又有一種脾泄瀉服泰山老李炙肝散而愈乃白芷白朮白芍藥桔梗四味也

醫餘

痢有赤白

凡人患痢不問赤白脉小身涼者易安脉大身熱者難差患痢未有不腹痛者皆緣有積也暑積及熱積多患赤痢冷積多患白痢亦有腸胃

有風而患赤痢者有冷熱不調而患赤白痢者
暑積痢可用黃連阿膠元綿煎散加滑石白痢
可用駐車元感應元之類冷熱不調用戊己元
巴豆元子之類綿煎散入滑石治赤痢極有功
又有豆飲子加減亦有功治諸般痢用之每有
效官局靈砂丹亦甚奇此數藥自夏及秋皆不
可闕也

同上

罌粟治痢

治痢以罌粟古方未聞今人所用雖其法小異



而皆有奇功或用數顆慢火炙黃爲末米飲下
或去粟用殼如上法或以殼五七枚甘草一寸
半生半炙大碗水煎取半碗溫溫呷蜀人山叟
曰用殼并去核鼠查子各數枚焙乾末之飲下

尤治噤口痢

泊宅編

車前止暴下

歐陽文忠公常得暴下國醫不能愈夫人云市
人有此藥三文一貼甚效公曰吾輩臟腑與市
人不同不可服夫人使以國醫藥雜進之一服

而愈召賣藥者厚遺之求其方乃肯傳但用車
前子一味爲末米飲下二錢匕云此藥利水道
而不動氣水道利則清濁分穀臟自止矣

良方

薑茶治痢

憲宗賜馬摠治瀉痢腹痛方以生薑和皮切碎
如粟米用一大盞并草茶相等煎服之元祐二
年文潞公得此疾百藥不效而予傳此方而愈

同上

二藥治痢



鄂渚有統制王存病痢幾年無休無息骨立垂死逢道人令煎四物湯下駐車圓每服一百粒初服此藥減半併服之不數日頓愈

近世養生方

治臟腑

肉豆蔻剉作甕子入通明乳香少許復以末塞之不盡即用麵和少許累豆蔻煨焦黃爲度三物皆礮末仍以茶末對烹之

大集

半夏益脾止瀉

半夏今人惟知去痰不言益脾蓋能分水故也

脾惡濕濕則濡而困困則不能制水經曰濕勝則瀉一男子夜數如廁或教以生薑一兩碎之半夏湯洗與大棗各三十枚水一升薤白中慢火燒爲熟水時時呬數日便已

乳煎葦撥治氣痢

獨異志唐貞觀中張寶藏爲金吾長上嘗因下直歸櫟陽路逢少年畋獵割鮮野食倚樹嘆曰張寶藏身年七十未嘗得一食酒肉如此者可悲哉傍有僧指曰六十日內官登三品何足歎

也言訖不見寶藏異之即時還京師時太宗苦
於氣痢衆醫不效即下詔問殿廷左右有能治
此疾者當重賞之寶藏曾困其疾即具疏以乳
煎葦撥方上服之立差宣下宰臣與五品官魏
證難之逾月不進擬上疾復發問左右曰吾前
飲乳煎葦撥有功復命進之一啜又平因思曰
嘗令與進方人五品官不見除授何也證懼曰
奉詔之際未知文武二吏上怒曰治得宰相不
妨已授三品官我天子也豈不及汝耶乃厲聲

醫藏卷之六
曰與三品文官授鴻臚卿時正六十日矣其方
每服用牛乳半升葦撥三錢匕同煎減半空腹
頓服
良方

臟腑秘澀

老人臟腑不可用大黃老人津液少所以秘澀
更服大黃以瀉之津液皆去定須再秘甚於前
只可服寬潤大腸之藥如養生必用方二仁元
是也更用槐花末煎湯淋洗亦妙風藥燥腸
又有一種風秘者當用檳榔七聖元雖有大黃

斟酌服之勿令瀉可也又有婦人產後大便秘
須四五日六七日不通者出血已多津液少也
濃煎紫蘇湯飲一兩盞自通更一日不通服局
方大麻仁元三十元

醫餘

腸胃流熱

腸胃流熱則糞門暴腫用蝸牛細研塗之則消

腸風痔疾

痔腸風臟毒

痔腸風臟毒一體病也極難得藥亦緣所以致

疾不同雖良藥若非對病固難一槩取效常人酒色飲食不節臟腑下血是謂風毒若釋子輩患此多應飽食又坐體氣不舒而得之乃脾毒也王渙之知舒州下血不止郡人朝議大夫陳宜父令其四時取其方栢葉如春取東枝之類燒灰調二錢服而愈予得方後官贛上以治貳車吳令昇亦即效提點司屬官陳逸大夫偶來問疾吳倅告以用陳公之方而獲安陳君蹙頰曰先人也仍須用仄栢爲佳道場慧禪師曰若

